

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

U današnjoj hutbi govorit ćemo o strahu od Allaha, dž.š.. U prošle dvije hutbe, govorili smo o Allahovoj Milosti i nadi u nju.

Međutim, govoriti o strahu od Allaha, dž.š., veoma je važno i bitno, jer to zadire u srž našeg vjerovanja, jer bez čvrstog vjerovanja u Allaha, dž.š., i straha od Njega, nema pravog mu'mina. Mu'min je između dva stanja; nade Allahovu, dž.š., Milost i straha od Njegove kazne.

Uzvišeni Allah u 49. i 50. ajetu sure El-Hidžr, kaže: „**Kaži robovima Mojim da sam Ja, zaista, Onaj Koji prašta i Koji je milostiv, ali da je i kazna Moja, doista, bolna kazna!**“

Allah, dž.š., nas upozorava da se ne bojimo prokletog šejtana i onih koji pristaju uz njega, već da se samo Njega - Allaha, dž.š., bojimo i da je to jedan od znakova našega imana: „**To vas je samo šejtan plašio pristicama svojim, pa ih se ne bojte, već se bojte Mene, ako ste mu'mini!**“ (Ali Imran, 175)

Strah od Allaha, dž.š., sprečava čovjeka da čini grijeha i upućuje ga na pokornost, a nedostatak straha vodi nemaru i činjenju grijeha.

Vjernik ne smije da bude bez straha od Allahove, dž.š., kazne, jer ga On na to upozorava u 99. ajetu sure El-Ea'raf: „**Zar oni mogu biti sigurni od Allahove kazne? Allahove kazne ne boji se samo narod kome propast predstoji.**“

Poslanik, s.a.v.s., u hadisu koji bilježi imam Tirmizija a prenosi Ebu Zerr, r.a., savjetuje ashabe da budu istinske muttekije (bogobojaznici) i kaže: „**Ja vidim ono što vi ne vidite i čujem ono što vi ne čujete! Oglasila su se nebesa i imaju pravo da se oglase. Nema na njima mjesta koliko je četiri prsta, a da nema meleka koji je svoje čelo na sedždu Allahu spustio. Tako mi Allaha, da znate ono što ja znam malo biste se smijali, a mnogo plakali! Ne biste se sa ženama u posteljama naslađivali, već bi se popeli na brda i ponizno molili Allaha. Volio bih da sam drvo koje će se posjeći.**“ (Tirmizija)

Razmislimo o ovome hadisu, draga braćo i sestre i trudimo se da prednjačimo u dobru!

Allahov Poslanik, s.a.v.s., najviše se bojao Allaha, dž.š.. U hadisu koji prenosi Aiša, r. anha,

Poslanik, s.a.v.s., je rekao: „**Ja najbolje od vas poznajem Allaha i ja Ga se najviše bojim.**“ (Buharija)

Braćo i sestre, ako proučimo stanje ashaba i generacija poslije njih iz reda dobrih prethodnika ovog Ummeta, primijetit ćemo da su oni stalno činili dobra djela i da su i pored toga mnogo strahovali.

Mi smo braćo i sestre, bez izuzetka, u odnosu na njih, u velikom gafletu (nemaru) i mnogo toga uzimamo olahko.

Što bi mi trebali kazati za sebe, kada Ebu Bekr Es-Siddik, r.a., kojem je obećan Džennet za života na dunjaluku, kada bi stao na namaz, tresao bi se kao prut od straha od Allaha, dž.š., a kada bi imamio, učio je Kur'an plačući.

Omer ibn El-Hattab, r.a., na samrti je rekao svome sinu Abdullahu: „*Sine, spusti moju glavu na zemlju, ne bi li mi se Allah smilovao!*“ Zatim je tri puta rekao: „*Teško meni, ako mi Allah ne oprosti!*“ I onda je ispustio dušu.

Na obrazu Abdullaha ibn Abbasa, r.a., bile su dvije brazde od suza koje su često tekle iz njegovih očiju iz straha od Allaha, dž.š.!

Kada se Muazu ibn Džebel, r.a., primakla smrt, rasplakao se, pa mu bi rečeno: „*Zašto plačeš,*

kada si jedan od ashaba Poslanika, s.a.v.s., i kada se zna što si sve učinio za islam?“ Reče: „Ne plačem zbog straha od smrti, niti zbog toga što ostavljam dunjaluk, već plačem zbog dvije skupine, a ja ne znam od koje sam ja: od stanovnika Dženneta ili stanovnika Džehennema!“

Amr ibn As, r.a., kaže: „*Da pustim samo jednu suzu iz straha od Allaha, draže mi je nego da udijelim sadaku od stotinu hiljada dirhema!*“

Prenosi se od Hasana El-Basrija, rahimehullah, da je rekao: „*Omer ibn Abdul-Aziz bi učio Kur'an, pa kada bi proučio neki ajet, zaplakao bi i onda bi se gušio u suzama sve dok ne bi pao, pa bi ostao u kući dok ga ljudi ne bi počeli obilaziti, misleći da je bolestan.*“

Braćo i sestre, budimo od onih koji se istinski boje Allaha, dž.š., i pripremajmo se za Dan polaganja računa, Dan na kojem neće koristiti imeci, potomstvo i rodbina, već samo dobra djela!

Gospodaru, pomози svim ugroženim muslimanima i podari im slobodu i mir! Učvrsti nas na Putu islama i učini nas od onih koji se samo Tebe boje i Tebi iskreno robuju i na ruku i sedždu Ti padaju! Oprosti našim roditeljima i

našim dobrim precima, koji su na nas prenijeli svjetlo vjere! Uputi i učvrsti našu djecu i potomke i učini ih našom radosti na obadva svijeta! Oprosti nam grijehе i počasti nas u Džennetu društvom poslanika, iskrenih, šehida i dobrih ljudi!

Amin!

Prethodne hutbe potražite na našoj stranici: www.medzlis-split.org
Pripremio: Vahid ef. Hadžić
na osnovu pisanja Nezim ef. Halilovića Muderrisa
Split, 9.2.2018.

